

國子監志

國子監志卷七十九

藝文志十三

雜著

太學祀典考序

彭定求

國家建興學校王祀

夫子崇德報功萬世無窮而淵源衍續舉夫羽翼經傳股肱大道者皆得與於見知聞知之列侑享光榮是以道統炳如日星學術炯於龜鑑固所稱六合同風九州共貫者然太學者四方之標

準也王化之行自近者始辟廱典禮累朝崇重  
微獨楹桷樽俎軒懸舞佾之屬節文度數煌煌  
明備有非郡國之所埒即凡筵之登降名號之  
異同述經損益載在令典而四方猶未及周知  
志古學禮之士能不講明而究晰之歟仰惟

聖天子稽古右文欽崇

先師表章絕學俾四海萬年知所法程臣下幸際其  
時躬履其地夙夜祇承懼無以導揚萬一惟是  
瞻顧宮牆駿奔俎豆儼乎如接其人凜乎如親

其範庶幾仰高山景行之意而竊慮戛戛乎其難之也張君璿官典簿恂恂莊莊守職惟謹灌將裸獻之餘不獨循故事奉文書而已以祀典定於太學未有著為成書垂示藝林者因自先師以下遞及四配十哲先賢先儒按序臚陳綴集羣言裒輯嫩蹟詳而有徵蹟而有紀從此遐方近域得識

聖朝化行首善禮制增崇之盛且千載上下作述相承其所以正心修身牖民範俗者可以指掌而

知披籍斯在則凡為聖賢之徒臨之在上質之在旁宜何如其感發而興起也嗚呼今伙志古學禮者盡如是亦誠足嘉尚矣哉予故於是書樂觀其成焉

石鼓文跋

朱彝尊

石鼓籀文雖與大篆小異然離鐘鼎款識未遠其為三代之物信矣而諸家或疑之馬子卿至謂宇文周所刻誠僖父之言也十鼓向闕其一皇祐間始得之歐陽永叔見之最早文存四百

六十五字爾。薛尚功則云歲月深遠缺蝕殆盡。今款識所載乃得之前人刻石者。方之永叔僅多二字。胡世將資古紹志錄云。所見者先世藏本。在集古之前。僅益九字。至潘恆山作音訓時止存三百八十有六字而已。楊用修謂從李賓之所得唐人拓本多至七百有二字。又言及見東坡之本。人多惑焉。愚攷第三鼓潘氏音訓有避衆既簡句。古文苑脫避字有衆字。用修不取。易以六師二字。第四鼓潘本有四馬其寫六轡。

「驚句驚上脫一字」古文苑本驚作重文用修亦不取易以六轡沃若第五鼓霑雨上古文苑有漢漢二字薛氏施氏本則有天字用修亦不取增我來自東四字夫車攻狩於東故云駕言徂東東有甫草若岐陽在鎬京之西豈得云我來自東乎至於第六鼓因民間謠以為白其上漫漶以諸鼓驗之每行多者七字少者六字此鼓行僅四字上皆缺二三字用修每行增一字強之成文又如第七鼓用修增益徒御嘽嘽會

同有繹或羣或友。悉率左右以燕天子。咸與小雅同文。不知鼓文每行字有定數。難以增益。尤有異者。鼓有𠄎文。郭氏云恐是臭字。古老反。大白澤也。用修遂以惡獸白澤入正文中。其亦欺人甚矣。攷賓之石鼓歌中云。家藏舊本出梨棗。楮墨輕虛不盈握。拾殘補闕能幾何。以一涓埃裨海嶽。夫以歐陽薛胡諸家所見止四百餘字。若賓之本有七百餘字。拾殘補闕亦已多矣。賓之不應為是言也。子瞻之詩曰。韓公好古生已



遲我今況又百年後強尋偏旁推點畫時得一  
二遺八九模糊半已似癡牴牾曲猶能辨跟肘  
子由和之有云形骸偃蹇任苔蘚文字鉞剝困  
風雨字形漫汗隨石缺蒼蛇生角龍折股夫用  
修之本旣得自賓之傳自子瞻是子瞻克見其  
全子由亦得縱觀於子瞻子由又不應為是言  
也杜子美詩有曰陳倉石鼓久已訛韋蘇州詩  
有曰風雨缺謠苔蘚澀而韓吏部歌曰公從何  
處得紙本毫髮盡備無差訛又曰年深豈免有

缺畫則石鼓在唐時已無全文故吏部見張生之紙本以為難得也吳立夫詩亦云岐右石鼓天下觀駱駝載歸石盡爛夫以唐宋元人未見其全者用修獨得見之此陸文裕亦不敢信由石鼓而推之用修他所考證吾亦不能已於疑無惑乎陳晦伯有正楊一編矣

監本蘭亭跋

朱彝尊

書至右軍入聖右軍書至蘭亭而變化無方後人品評以定武本為最歐陽率更所臨也流傳

有玉有石。有棠梨板字有潤行有斷損。有肥有瘦。有始肥終瘦。各本不同。相傳石晉廣運中契丹輦歸。棄之中道。而榮次新言。宋定國使金。云在中京。中京遼之南京。金海陵改為中都。即燕京也。吾鄉沈先輩虎臣撰野獲編云。萬厯乙酉丙戌間。北雍治地得楔帖行款肥瘦。與定武本略同識者疑是廣運所棄石。時長洲韓公存良官國子祭酒。拓數百本遺友朋。合之次新所述。或即薛氏摹勒未可定耳。

石鼓記

成德

予每過成均徘徊石鼓間輒悚然起敬曰此三代法物之僅存者遠方儒生或未多見身在輦轂時時摩挲其下豈非至幸惜其至唐始顯而遂致疑議之紛紛也元和志云石鼓在鳳翔府天興縣南二十里其數盈十蓋紀周宣王田於岐陽之事而字用大篆則史籀之所為作也自貞觀中蘇勉始誌其事而虞永興褚河南歐陽率更李嗣真張懷瓘韋蘇州韓昌黎諸公並稱

其古妙無異議者。迨歐陽文忠則疑自周宣至  
宋垂二千年。理難獨存。夫岫嶠之字。岳麓之碑。  
年代更遠。尚在人間。此不足疑一也。程大昌則  
疑為成王之物。因左傳成有岐陽之蒐。而宣王  
未必遠狩豐西。今蒐岐遺鼓。既無經傳明文。而  
帝王輟迹。可西可東。此不足疑二也。至溫彥威  
馬定國。劉仁本。皆疑為後周文帝所作。蓋因火  
大統十一年。西狩岐陽之故爾。按古來能書如  
斯。冰。邕。瑗。無不著名。豈有能書如此而不名乎。

况其詞尤非後周人口語。韋李虞褚歐陽近在唐初亦不遽爾昧昧。此不足疑三也。至鄭夾漈王順伯皆疑五季之後鼓亡。其一雖經補入未知真偽。然向傳師早有跋云。數內第十鼓不類訪之民間得一鼓。字半缺者。較驗甚真。乃易置以足其數。此不足疑四也。鄭復疑靖康之變未知何在。王復疑世傳北去棄之濟河。嘗攷虞伯生嘗有記云。金人徙鼓而北。藏於王宣撫宅。迨集言於時宰。乃得移置國學。此不足疑五也。予

是以斷然從元和志之說而並幸其俱存無偽焉。嘗歎三代文字經秦火後至數千百年雖尊彝鼎敦之器出於山巖屋壁隴畝墟墓之間苟有款識文字學者尚當寶惜而稽考之况石鼓為帝王之文列膠庠之內豈僅如一器一物供耳目奇異之玩者哉謹記其由來以告夫世之嗜古者。

祭酒司業題名記

余正健

國家設學首重成均蓋化民成俗道莫先於此也

欽惟

世祖章皇帝尊崇儒術定鼎之初

親臨講學我

皇上右文重道

御極之八載即

躬幸辟廱又

製訓飭士子文立碑太學雲漢天章作人壽考存神過

化文治極隆時諸長貳於斯者率皆一代碩儒  
文章彬郁道德溫醇故或入掌絲綸或出居方



岳或鳳沼揚芳或鴻達高漸數十年來麟麟炳  
炳照曜後先某等菲材承乏茲任喜遭異數永  
念

恩榮謹輯

國朝來兩廂姓名勒諸貞石以垂永久雖然名以  
官傳官以人重吾輩膺斯職者果克仰體

聖天子育材至意正己率屬宏敷教化庶幾無忝師儒  
則名與官真堪不朽如或徒以官傳也後之觀  
斯石者稱斯人也其謂之何哉是則可警也已

石鼓音訓跋

李周望

石鼓文本未諸家辨論甚詳唐貞觀以來蘇勗李嗣真張懷瓘竇泉竇蒙徐浩咸以為史籀手跡虞世南歐陽詢褚遂良皆有墨妙之稱杜甫八分小篆歌序歷代書亦廁之倉頡李斯之間韋應物石鼓歌云周宣大獵兮岐之陽刻石表功兮煒煌煌又云飛滿委蛇相糾錯乃是宣王之臣史籀作韓愈歌周網陵遲四海沸宣王奮起揮天戈蒐於岐陽騁雄俊萬里禽獸皆遮羅

鐫功勒成告萬世鑿石作鼓隳嵯峨梅堯臣呈  
祭酒吳公詩石鼓作自周宣王宣王發憤蒐岐  
陽蘇軾詩舊聞石鼓今見之文字鬱律蛟龍走  
憶昔周宣歌鴻雁當時火籀辨蝌蚪之數子皆  
好古名賢其言必有考據朱子詩傳遺說曰石  
鼓有說成王時又有說宣王時然其辭有似車  
攻甫田恐是宣王時未可知由是觀之則石鼓  
為宣王獵碣史籀書迹無疑也蓋其初散棄陳  
倉野中韓愈為博士時請祭酒以數橐駝輿至

太學不果。鄭餘慶遷之鳳翔。

孔廟中經五代亂復散失。司馬池待制知鳳翔。輦至府學門廡下。以木櫺護之。而亡其一。蓋散失後。民有穴其中。以為臼者。即今第六鼓也。宋仁宗皇祐四年。向傳師求得之。十鼓乃足。大觀中。自鳳翔徙汴京。徽宗以金填刻文。初置辟雍。後入保和殿。靖康末。金人輦至燕京。別取其金而置之。王宣撫宅。宅後即大興府學。元成宗大德十一年。虞集為大都教授。於泥土草萊中。洗刷扶

植仁宗皇慶二年集為助教言於時宰置今太學大成門內左右各五為碑壇承之又為疎櫺扃鐫之三代金石遺文惟此而已誠聖王之故蹟千古之奇蹤歐陽修亦以為非史籀不能作是矣至元己卯司業潘迪考訂今文著為音訓泐碑於大成門西謹錄於右以備參攷

國學禮樂錄序

李周望

成均典樂之職禮教之地也昉自虞廷其風尚矣周備四代之學王畿之內號為辟廱蓋以明

首善之義。與鄉學不同。秦火以後。學校淪廢。漢至元狩。始議建於董生策中。元成之世。弟子增衆。光武重興太學。親臨講論。立十四博士。以授五經。明帝習射養老。章帝大會諸儒。一時虎觀橫經。彬彬稱盛。晉武雅尚儒術。以賈馬鄭杜伏孔王何之徒。分立八家儒學。命張華劉實領之。太常咸寧後。乃立國子學。以教貴游子弟。東晉士夫。習尚莊老。流及六朝。南北興廢無常。至隋開皇。國子寺始不隸於太常。唐則六學皆歸國

予宋增三館而學規之善莫或過於胡瑗焉三  
齋雜儀肇元許衡六堂考課沿明永樂日久漸  
弛僅屬空文

皇朝定鼎京師振興文教

世祖章皇帝視學釋奠百廢俱張我

皇上生知好古重道崇儒

御極之初即

臨雍講學隆禮

先師超越百代

特製訓飭士子文立碑造就加意勸懲時際雍熙禮明  
樂備久道化成更修輯諸經闡晰性理辨別律  
呂審定元音集道統之大成作君師之極範近  
復升祔名儒增襲博士凡所以光輝俎豆鼓舞  
人材之典無所不至猗歟休哉士生金聲玉振  
之世獲漸菁莪棧樸之風良厚幸矣余自甲午  
承乏司業旋陞侍講即奉

命校士全楚日與諸生撤幃講業務趨醇古以應昌期  
役竣復膺司成重任受



恩汪渥報稱無由爰與方山謝公冰兢共矢月吉宏宣  
聖訓督課惟勤而諸生文風亦日新月盛雖然

國家儲賢養士豈徒以文章華國潤色鴻業云爾  
哉要求實行以資大用也余惟古之教士自小  
學以至大學既已身通六藝尤必陶養性情以  
為修齊治平之本春秋教以禮樂冬夏教以詩  
書入德有方修道有序興詩立禮成樂次第較  
然不可易也太史公適魯觀

孔子廟堂車服禮器諸生以時習禮其家乃故事之

可證者。况國學賢關。人材淵藪。士列橋門之下。而不辨禮儀樂奏之詳。典祀損益之故。又何以自立於儒雅之林。備異日

廟堂之選乎。爰采志統諸書。薙其繁冗。少為編次。錄成一書。以示諸生。俾知國學禮樂所在。斯須不可去身。亟宜研窮義理。考核名實。禮以謹其節。樂以發其和。庶幾由博而約。以漸臻乎希聖希賢之域。仰承

聖天子壽考作人之化行。且比隆周室。遠接虞廷。漢唐

以後曷足道哉是為序

進士題名碑錄序

李周望

科目用人由來舊矣周禮大司徒以鄉三物教萬民而賓興之又曰三年大比考其德行道藝獻賢能之書於王王拜受之登於天府誠慎之也誠重之也其人材則惟出於鄉國二學鄉學掌於鄉大夫而用之在大司徒國學掌於大樂正而用之在大司馬鄉士曰選士升於國曰造士大司馬所辨論則曰進士此三物賓興之典

也。漢世去古未遠，舉士之制有三：賢良、孝廉、博士弟子。後世科目歲貢所由昉也。隋大業時，專以文辭試士，曰進士。唐用三科，十九目，其由學館者曰生徒，由州縣者曰鄉貢，皆升於有司而進退之。其天子自詔者曰制舉，所以待非常之才，無常科也。科目唐制，亶其然乎？天授初，武后策貢士於洛城殿，殿試昉於此。宋進士諸科秋取解，冬集禮部春考試，合格者放榜於尚書省。開寶六年，殿試貢士，遂為永制。八年，始分三甲。

熙寧貢舉新法罷詩賦專經義建炎以來兼用  
經義詩賦分作兩科元仁宗立經書取士法八  
月鄉試二月會試皆三場首场四書二經一二  
場詔誥賦表内科一道三場時務策一道書義  
用朱子章句集註而斷以己意發明限三百字  
分左右榜蒙古色目為右漢人南人為左明洪  
武四年辛亥太祖始策問會試中式者於奉天  
殿賜一甲三人進士及第賜二甲進士出身賜  
三甲同進士出身以次授官十八年乙丑授一

甲三人修撰編修俱入翰林使三甲進士觀政於諸司其在翰林承敕監等衙門者曰庶吉士至永樂二年甲申選二十九人為庶吉士在文淵閣讀書後惟翰林院有庶吉士其以及第一人為狀元第二人榜眼第三人探花則仿宋制而是時士大夫又通以三甲第一為傳臚其會試第一者曰會元鄉試第一者曰解元鄉試以子午卯酉年會試以辰戌丑未年後雖條例數更其大綱固不易也

聖朝定鼎京師聲教訖於四海

世祖章皇帝裁定科舉法制大備我

皇上道隆德盛壽考作人鼓舞振興不遺餘力而且範之以

聖學教之以

帝文久道化成與天同照以故得士之盛直躋唐宋元明而上之躋漢魏周無與讓也太學題名碑記元僅有存者明代石刻隨缺旋補

本朝自順治丙戌至康熙戊戌凡二十有八科惟

壬辰乙未分滿漢二榜各三鼎甲及二甲三甲  
自後歷科仍合為一榜未嘗分也士既釋褐登  
朝則必題名於學師師濟濟接踵彙征取士至  
今日而極盛無以加矣我

皇上御極以來揭榜已二十有一次後更不知凡幾非  
算數所能測也猗歟休哉

聖世樂育之英材徧列於槐棘大僚前二三十年間  
先帝之舊臣參錯在位迨於

今日無一非對策賜言於我



皇之清問者矣。或一門之內，祖孫父子兄弟相繼而登，  
膺仕或異姓之交，師長傳其弟子，層累以降，源  
遠末分，而並登華貫者，更不可勝數也。試入成  
均遊橋門，所見穹碑林立，莫不摩挲指顧曰：「某  
某以德行傳，某某以功業顯，某某以文章詞翰  
稱，奎壁光華，先後輝映，豈非千載之勝覽哉？」予  
夙稟庭訓，繼蹟科目，承乏司成，濫登宮尹，不敢  
忘策名所自，謹錄

國朝歷科題名碑姓氏為初集，俟次第增益，使多

士觀感踊躍咸知我

皇教澤深厚文治邅隆以垂示無窮而元明舊碑之在  
辟雍者并附錄之備考鏡焉是為序

國學禮樂錄序

謝履忠

考成周教士之制鄉學有六藝太學有四術六  
藝者禮樂射御書數也四術者禮樂詩書也雖  
教之詳略不同皆以禮樂為先務至於教和別  
宜化民成俗動四氣之和以著萬物之理則禮  
樂明備天地官矣禮樂之為用大矣哉顧歷代

制作互有損益其存而可考者獨萃於國學我  
皇上聰明聖哲久道化成希天之學日新崇正之功大  
闡廣勵學宮超越前古士生其時莫不沐浴元  
化涵泳聖涯况乎領師儒之官持教育之柄其  
為感激思奮而潤色鴻猷誠有不能自己者矣  
大司成李南屏先生嘗為國子司業又典三楚  
學政日以訓士為孜孜今之復領成均也穆然  
深念曰時教必有正業孰有大於禮樂者乎於  
是殫思研慮纂為國學禮樂錄一書明

先師之統系揚

御製之褒崇。綱領昭然矣。序世家列傳。所以濬禮樂之源。詳祀典述經志。繪圖譜陳儀注。所以備禮樂之事。附以石鼓音訓。見三代之軌物。而岐陽之狩。亦禮也。綴以題名碑記。則皆奉行禮樂之人也。蓋先生之為是書也。採擇廣。咨訪切。辨正嚴。序次確。即譾陋如予。通懷商榷。析疑訂誤。至再至三。娓娓不倦。於是見先生虛公之衷。不僅用之掄才造士。而陶淑人心之雅意。方且通億載。

而為津也。予於先生為後進鉛槧之間，無能為役，適以戊戌春後先受事六館，規條詳加釐正。至於剔弊屏浮，除翳振雅，予於先生去私見持大公，毋激毋隨，共盟此心，同勦厥職。兩年以來，人知重廉恥，習禮讓，士亦相敦以實行而不務聲華。皆先生維挽之力，而予與有榮焉。然則是書之成，足以範士心，興民行，敬承

聖天子中和之德，以溥斯世於仁壽之域，而凡有志於禮樂者，由此悉其源流而探其本末，其所裨益

豈止一時一人而已哉是為序

石鼓文鈔序

孫岳頌

蓋聞六書初肇始變蟲魚八法相生未離蝌蚪  
篆籀開自史游實著金鉞之奧冊書定於許慎  
式垂玉尺之文載在鐘彝傳乎金石斯則伏羲  
創卦之歲即有成書神禹鑄鼎之年非無古畫  
藏諸汲冢不委殘灰列彼明堂猶存舊物者矣  
自昔岐陽薄伐閱武于田姬室中興成功告廟  
爰鑿石以作鼓遂鐫筆而播詞車攻馬同懋紀

行狩之盛。建旄設旆。侈陳獲醜之多。圭璧於焉會朝。獫狁因茲作貢。龍文螭篆。備典核以盡神。斗錯星盤。肆縱橫而極勢。文詞則申甫而下書。法則李斯以前。既已珍比和鈞。非徒玩同琬琰。洎乎祚移洛鎬。西京之俎豆淪胥。燄起咸陽。東魯之詩書焚棄。蕢梓土鼓。盡沒寒烟。卽鼎商盤。半歸茂草。譬之磬沉泗水。奚來大呂之音。劍躍延津。欲化干將之質。縱橫神物。共付劫塵。而况陵谷無憑。興亡遞嬗。秦皇戰壘。金鉞徒遺。漢主

離宮珠盤還碎年年荆棘不少銅駝處處荒陵  
頗多玉盞於是星移物換石爛湮枯鳥迹終埋  
龜文盡蝕張華望氣漫識龍泉柯萼登山還逢  
石篆始從陳倉之野得此蟲凋蘚剝之餘亟還  
清廟之中置於左鐘右虞之列龍蛇糾錯自創  
一家甲乙斑斕僅存九數猶幸夜光終還乎合  
浦連城不碎於秦庭信有鬼神之呵競為符璽  
之守迨夫大觀紀歲再徙汴河天子臨雍仍登  
壁水苔痕剝落藉金質以為相風骨嶙峋比銀



鈎而加隋無何塵飛遼海馬牧中原燹下焦桐  
半填溝壑廟中欹器頓委坵墟駝載於市駿臺  
前僅剝黃金一篋沉淪於躍龍池畔誰捫綠字  
千言嗣是碣石開宮燕山作室搜羅鴻寶無煩  
博士之上書護惜殊珍願聽成均以從事虛廊  
素壁同藏柱下之遺荒碣殘碑並映斗間之氣  
以迄

聖朝應運定鼎燕山

皇上乘乾舞干堯陞孟銘凡誠備采掖庭河圖洛書日

陳講幄旌旗出獵長楊細柳之郊玉帛來同賂  
面文身之國宜其崇茲法物媲美宮懸詰曲龍  
章配六堂之鐘鼓蒼涼鳥策照四庫之典墳自  
古已然於今為烈嗟乎日銷月鏹徒留黑闥之  
名地老天荒孰辨赤文之字淵源可溯猶存愈  
軾詩篇意格難尋豈有鍾王墨本雖復桓榮稽  
古已遺斷簡之什三束皙補亡遑輯殘編於一  
二然而見中郎之鳥篆則傳觀咸訝其精觀安  
道之雞碑則好事羣驚其妙模糊隻字尚抵千

緡滅沒雙鉤還聞二雅非憑闡繹曷恃揣摩爰  
有高陽才子邗水名流獵志墨池走衛瓘一臺  
之譽弋情碧篆習中正八體之書薤葉韭花兼  
工刻畫爛銅破玉不廢雕鏤躡屨擔囊仿士衡  
之入洛攜琴載筆效司馬之游梁偶客金臺間  
尋石鼓摩挲蒼綠疑為脉望之留捫摸丹青無  
復金躔之聚因而剡苔剔蘚漸收倉頡之蹤補  
缺拾殘直煉女媧之石得字三百以外厯年二  
千有奇亥豕交訛既經剖析魯魚同異必慎參

稽假以三冬。彙為一卷。懸之都市。駕呂覽之春秋。播厥洛陽。並太沖之詞賦。陸龜蒙之小名片。錄未足比其宏通。李萬卿之說苑一編。奚能方其淹洽。遺文可讀。長為鳳閣之奇書。古學斯傳。永識龍鱗之初體。

大學十詠序

黃叔琳

古者典學教胄。子教以直溫寬簡。變化其氣質。即導以歌詩言志。涵養其性情。蓋溫柔敦厚之旨。流連諷詠。可以陶淑身心。而播諸清廟明堂。

遂以鼓吹休明表章風化信乎詩之為教綦重而教學者之所宜先也錢塘王先生分教諸生於太學授受餘閒倡為十詠三舍生翕然廢和成帙蓋人文所聚其英華之氣必有所憑而發以鳴其盛而宣其豫望古遙集觸景興懷既原夫教胄言志之遺又足以導揚盛美則勿謂斯編無關於

國家文治也門人邵子屺雲攜以就正於予予迴憶貳長成均已四十餘年橋門蒼翠石鼓嵯峨

讀諸詩。直依然昨日耳。邇來棧樸菁莪。蒸蒸日上。  
盛諸生更從王先生涵泳優游。勉其未至而進。  
於古行且聽歌鐘鼓篴。揚風扞雅而觀教化之  
成矣。

謹案大學十詠。一曰周宣石鼓。二曰元代老槐。  
三曰柏庭翠蔭。四曰石井甘泉。五曰兩序書聲。  
六曰六堂燈火。七曰長廊步雨。八曰射圃歸鴉。  
九曰輦道月明。十曰橋門雪霽。學錄王雲廷所  
撰。共五言律詩十首。一時和者有陳憲祖等十

四人集刻為一卷

續刻進士題名碑錄序

孫嘉淦

皇上御極之八年歲在庚戌會試廣額至四百名予既奉

命為副考官而兼職司成因得觀諸進士釋褐於太學尋循例刊題名碑樹碑於橋門外甚盛典也考唐進士自神龍以來杏園宴後皆於慈恩寺塔題名他時有將相者則朱書其下宋世進士諸科放榜後綴行期集列序名氏鄉貫三代書之

謂之小錄俱未鋟諸石也。明自永樂二年命工部建進士題名碑於國子監。十三年會試天下貢士於北京。登科考謂是年即命立石國子監。然今無有。有之自宣德五年林震榜始。

本朝自順治丙戌迄今。豐碑林立。繼此者三年一增。人材之盛。不可紀極。是豈徒備故事示觀美已哉。夫士生

聖世。貴能有所樹立。以垂不朽耳。題名一碑。將使歷年久遠。而觀其姓氏。以考其德行事功文章之



實賢不賢之蹟一一可指數焉是勸懲由此興  
法戒於是備也顧碑石既多不能家拓而存之  
蔚州宗伯李渭湄先輩為國子祭酒時爰彙錄  
諸碑而鏤之板凡若干卷迄今十有餘年士風  
日益道上人文日益衆多於是庚戌諸子謀所  
以繼李公之志者而問序於余余曰是可使天  
下後世之出是途者循名責實思自樹立以無  
負

國家興賢育才之盛心也爰樂為之書其緣起如

此

進士題名碑錄序

宗室德沛

夫學以從政臨事始不苟執古制名於後能永傳故詩稱濟濟多士文王以寧書以君為元首臣為股肱蓋一體相需而後成也沛少嗜書不為章句學遨遊於六經諸史之間垂老策名輒懼不能臨事

天子以沛尚讀儒書以少宰而兼祭酒且

命教習庶常則成均翰苑皆所執也何敢讓焉考太學

進士題名錄倡於蔚州李公建庚戌續刻則合  
河孫公序之今乙丑諸子又補刻近科所闕敬  
錄

世宗憲皇帝上諭一道冠之端若康熙己未乾隆丙辰  
兩科博學鴻詞姓氏咸依次編載又得明貢舉  
志於錢塘王孫芸家遂增入洪武乙丑戊辰辛  
未甲戌丁丑建文庚辰永樂甲申丙戌甲辰凡  
九科而自有科目之制甲榜於斯乃備蓋前錄  
所無也沛時方纂修國子監志覈題名碑見存

橋門外者元三碑為

本朝吳祭酒苑於

啓聖祠土中得者明七十六碑始永樂十八年李  
騏榜訖崇禎十六年楊廷鑑榜或謂始於宣德  
五年林震榜殆悞也其缺者惟萬歷八年崇禎  
十年兩碑耳

國朝三十九碑始順治三年傳以漸榜以至今錢  
維城榜往見日下舊聞及他刻皆舛悞難據於  
是依各碑行列詮次分編監志第九卷可覽焉

今復續刻是錄錄與碑相為羽翼俾科名與載籍傳述無窮然蹟其人或臧或否或湮沒而無可稱豈天使為之哉蓋其自為之耳今之君子列是籍者當思風生虎變非徒奮爪牙於一身而所自樹立於身之前後者是在內外匪懈以媚

一人俾繼起諸君無可指其名以為口實其殆庶幾嗚呼是本也良可畏哉良可畏哉

從祀考

沈德潛

禮云始立學者釋奠於先聖先師釋者曰先聖  
謂如周公

孔子也先師謂凡先代明書之師也唐武德中以周  
公為先聖

孔子配享貞觀二年用天子禮樂祀周公於武王廟  
而升

孔子為先聖顏子配之二十年詔以左邱明等二十

二人左邱明卜子夏公羊高段梁赤伏勝高堂  
生戴聖毛萇孔安國劉向鄭眾杜子春馬

融盧植鄭元服虔賈逵何休王肅王弼杜預范甯配享

孔子廟堂凡以報其傳注之功所謂代用其書垂於國胄者也開元八年以四科弟子閔子騫等列享二十二賢之上而其他七十子之徒俱得從祀曾參大孝坐於十哲之次重其德也宋元豐七年始進荀況揚雄韓愈三人說者謂祀三人者為王安石配享王雱從祀地也政和三年封王安石為舒王配享殿上王雱在諸賢之次欽宗時從楊時請即行罷黜後并黜荀揚二人寶慶三年進朱子一人淳祐元年祀周子敦頤程

子顥程子頤張子載四人景定二年祀張子栻  
呂子祖謙二人咸淳三年更升顏曾思孟之配  
而進邵雍司馬光二人元文宗時進董仲舒一  
人明成化三年祀胡安國蔡沈陳澔三人嘉靖  
九年進歐陽修一人而黜戴聖以下十有三人  
戴聖劉向馬融賈逵何休王肅王後更進陸九  
鄉杜預鄭眾盧植鄭元服虔范甯淵一人後更進元儒許衡一人而明儒薛瑄胡  
居仁王守仁陳獻章亦並從祀我

聖祖仁皇帝以朱子有功四書章句及易本義詩傳等



書躋十哲之次而進范仲淹一人位歐陽修右

聖皇濬哲非議禮諸儒所能見及者也竊按唐武德以

後歷代所定從祀俱為平允惟明嘉靖聽張璁

議黜戴聖諸人有未安蓋經學遭秦火以後散

亡藏匿不絕如綫諸儒抱遺經於灰燼之餘箋

疏注釋轉相授受以待宋儒之興專門名家各

有所長此雖品行未純亦不得而廢之而況十

三人中馬融敗行而外即何休范甯之徒亦無

多闕失者耶則貞觀之制不宜盡改也抑又思

自漢以來表章經學未經從祀者授易如田何授詩如申培授書如大小歐陽授春秋如胡毋生傳魯論如夏侯勝傳孝經如長孫氏俱應增祀而唐儒如孔穎達顏師古王恭之徒注疏羣經功與漢儒相埒今擇其行之無闕者亦宜並祀抑又思卜子夏既列十哲之中則先儒二十二人已缺其一而六典國子祭酒司業條仍稱二十二賢於數不符相應改正酌而行之不傷於濫不隣於苛增吾道之光正經學之傳是在

為禮官者

太學進士題名碑記攷

姚文田

按進士題名碑錄舊序稱見橋門外者元三碑為

本朝吳祭酒苑於

啓聖祠土中得者明七十六碑始永樂十八年李  
騏榜訖崇禎十六年楊廷鑑榜其缺者惟萬歷  
八年崇禎十年兩碑耳又云舊錄無洪武乙丑  
戊辰辛未甲戌丁丑建文庚辰永樂甲申丙戌

永樂無丙戌  
蓋戊戌之悞

甲辰凡九科因得明貢舉志於錢  
塘王孫芸家遂增入焉竊疑洪武辛亥為首科  
何以獨未舉及又甲辰乃永樂二十二年已在  
李騏榜之後何以此碑轉軼會予擢任祭酒因  
先遣吏覆檢明代各碑見其首列洪武辛亥一  
碑而甲辰實缺心甚異焉暇日至碑下親自覈  
實始知所謂辛亥碑者乃正德辛巳楊維聰榜  
以文多漫漶內有洪武辛亥之言遂以為是其  
年耳甲辰榜補立於宣德九年因即列入宣德

以後當時撰述者祇憑胥吏而初未親檢此致  
悞之由也又所稱明七十六碑今實存七十七  
碑始於永樂十三年陳循榜並不始李騏且騏  
成進士在十六年亦非十八又所缺兩碑今皆  
見存萬厯八年張懋修榜乃天啓三年補立崇  
禎十年劉同升榜不題年號與立石年月遂以  
為無此二碑皆極謬悞大抵前人觀者但以碑  
後年月為據今攷次年立石者永樂乙未宣德  
癸丑正統丙辰壬戌景泰辛未天順丁丑甲申

嘉靖庚戌癸丑乙未壬戌乙丑萬歷乙未凡十三碑年久補立者永樂甲辰正統己未成化壬辰甲辰嘉靖己丑壬辰乙未戊戌甲辰丁未丙

辰

此碑已全漫漶僅有丙辰二字及後年月可辨

隆慶辛未萬歷甲戌

丁丑庚辰癸未壬辰癸丑丙辰凡十九碑以此每易致悞又碑石歲久磨滅如成化十一年謝遷榜十七年王華榜今皆僅存十年二字恐閱歲愈久則其文愈不可識所宜急錄之以備攷稽者也

附

元

國子學

先師廟碑

程鉅夫

皇慶二年春皇帝若曰我元繼百聖之統建萬  
民之極誕受厥命作之君師世祖混一區宇亟  
修文教成宗建廟學武宗追尊

孔子所以崇化育材也朕纂丕圖監前人成憲期底  
於治可樹碑於廟詞臣文之臣鉅夫拜手稽首

奉詔言曰臣聞邃古之初惟民生厚風氣漸靡  
聖人憂之越有庠序學校之制天下之治胥此  
出焉中統二年以儒臣許衡為國子祭酒選朝  
臣子弟充弟子員至元四年作都城畫地宮城  
之東為廟學基二十四年備置監學官元貞元  
年詔立

先聖廟久未集大德三年春丞相臣哈喇哈斯達爾  
罕大懼無以祇德意乃身任之飭五材鳩衆工  
責成工部郎中臣賈馴心計指授晨夕匪懈工



師用勸十年秋廟成謀樹國子學御史臺臣復  
以為請制可至大元年冬學成廟度地頃之半  
殿四阿崇尺六十有五廣倍之深視崇之尺加  
十焉配享有位從祀有列重門修廊齋廬庖庫  
為楹四百七十有八學在廟西地遜於廟者十  
之二中為國子監東西六館自堂徂門環列鱗  
比通教養之區為間百六十有七制加

孔子大成之號祀以太牢輦釋奠雅樂江南復戶四  
十隸之春秋二祀先期必命大臣攝事皇帝御

極陞先儒周敦頤程顥程頤司馬光張載邵雍  
朱熹張栻呂祖謙許衡從祀選弟子員三百進  
庶民子弟之俊秀相觀而善業精行成者歲舉  
從政又詔天下三歲一大比興賢能於是崇宇  
峻陞陳器服冕

聖師巍然如在其上教有業息有居親師樂友諸生  
各安其所學咸曰大哉天子之仁至哉相臣之  
賢工曹之勤其知政治之本原矣臣竊謂天地  
至神非風雨霜露罔成其功斯道至大非聖君

賢相同致其他人性至善非詩書禮樂罔就其  
器列聖相承謂天下可以武定不可以武治所  
以尊

夫子建辟雍復科舉誠欲人人被服儒行為天下國  
家用耳然則黎民於變時雍顧不在茲乎於戲  
隆哉臣鉅夫謹拜手稽首而獻頌曰皇元受命  
誕惟作京以撫萬邦既訖武功載修文教登其  
俊良於穆

宣聖垂範罔極道尊而彰曰爾曹子弗典於學曷風

四方學以聚之。庠以餽之日就月將。大德嗣服。  
廼建

孔廟。廼經辟雍。考制程材。審時相宜。廼成厥功。辟雍  
洋洋。冕服皇皇。羣士景從。聖道旣明。渙號旣加。  
我皇御天。軌道之中。軌物牖民。翼翼乾乾。帝德  
益宏。庶政惟和。我化用宣。躋祀儒師。賓興羣材。  
丕紹厥先。相古盛時。訐謏遠猷。罔不由賢。天錫  
皇祖。神聖文武。以有萬國。威何不加。令何不行。  
求何不獲。惟學是務。惟材是育。下民允迪。越厥

左右咸有一德以匡乃辟維帝時憲惟臣克念

濟濟茂碩禮明樂備永作神主播頌無數

雪樓集

賈侯修廟學序

吳澄

世祖皇帝既一天下作京城於大興府之北其祖社朝市之位經緯塗軌之制宏規遠謀前代所未有也至元二十四年設國子監命立

孔子廟暨順德忠獻王哈喇哈斯相成宗始克繼先志成其事而工部郎中賈侯董其役廟在東北緯塗之南北東經塗之東殿四阿崇十有七仞

南北五尋東西十筵者三左右翼之廣亦如之  
衡達於兩廡兩廡自北而南七十步中門崇七  
仞有四尺修半之廣十有一步門東門西之廡  
各廣五十有二步外門左右為齋宿之室以間  
計各十有五神廚神庫南直殿之左右翼以間  
計各七殿而廡廡而門外至於外門內至於廚  
庫凡四百七十八楹肇謀於大德三年之春訖  
工於大德十年之秋於是設官教國子已二十  
年矣寄寓官舍不正其名丞相以為未稱興崇

文教之實也。乃營國學於廟之西。中之堂為監。前以公聚。後以燕處。旁有東西舍。夾之東西各一堂。以居博士。東堂之東西。堂之西有室。東室之東西。室之西有庫。庫之前為六館。東西嚮。以居弟子員。一館七室。助教居中。以蒞之。館南而東。而西為兩塾。以屬於門。屋四周通百間。踰年而成。不獨

聖師之宮。巍然為天下之極。而首善之學。亦偉然聳天下之望。遠邇來觀。靡不驚駭歎美。其高壯宏

敬蓋微丞相其孰能贊聖天子之德意而微賈  
侯亦孰能闡彰賢宰相之盛心哉侯之董役也  
晨夕督視不避風雨寒暑措置分畫一一心計  
指授工師莫能違焉陞本部侍郎又陞本部尚  
書出領他處營造事身雖在外心未能忘廟學  
也至大二年還朝拜戶部尚書首詣廟學環匝  
瞻顧如其家然嗚呼世之居官者大率簿書期  
會刀筆筐篋是務知政治之有原名教之可宗  
者幾何人哉人咸以為迂而侯拳拳汲汲惟恐



或後蓋其資識卓矣侯少時為憲府屬憲長誣其副柄國者仇正直欲置之死數十人皆將連坐證左迫於拷掠悉附和以成其誣侯與在數中獨守正不阿徇淹繫三載卒不變移受誣者藉是得脫自戶部尚書而參議省事也會有羅織之獄侯議詳讞大忤時宰幾與同罪賴解救以免嗚呼侯之為人如此宜其於聖道儒術深有契也非資識之過人而能之乎侯每以范文正期國學諸生澄聞而媿輒面赤汗下夫文正

之為文正無他亦曰先天下之憂而憂後天下  
之樂而樂耳嗚呼安得人人不負侯之所期者  
哉侯名馴字致道濟南鄒平人將歸其鄉故著  
侯之所以有績於廟學者為頌至大四年三月  
朔國子監丞吳澄序詩曰於赫皇元澤彌八埏  
翼翼京師風化攸先

孔道昌明千古日月帝曰廟之以對光烈顯允龐臣  
欽輔神孫祖訓是承往聖是遵相謂而馴而職  
而職乃基乃構乃墁乃甃侯祇相言弗懈以虔

新宮巍巍有倬其宮牆之西學宮爰作我宏  
爾居爾懋爾學爾士來遊四方具瞻爾則匪遙  
像貌肅嚴恂恂賈侯克敦克敏孰挫其廉孰混  
其畛一正不阿百折不回族斯糾紛剗之恢恢  
廟學之崇天子之德丞相之功賈侯之力  
國子學告揭大成新匾文

吳澄

維京師立

先聖廟既落成之二年今天子嗣位乃加封大成之  
號恭惟

先聖道德高厚與天地參為萬世帝者師聖君賢相  
於位號廟祠務致崇極以風四方廟之堂曰大  
成之殿廟之門曰大成之門雖因前代之舊然  
大成二字實今天子所賜匾以斯名施之於今  
尤為宜稱日吉辰良爰揭新匾於殿之前門之  
外俾尊慕

先聖入其門升其堂者得所瞻仰焉謹以潔牲醴齊

用申虔告

同上

國子監後圃賞梨花樂府序

虞集

至大庚戌之仲春大成殿登歌樂成時雨適至  
我司業先生樂雅樂之復古顧甘澤之及時於  
是乎賦喜雨之詩推本歸功於成均之和迺三  
月辛巳國子監後圃梨花盛開先生率僚吏席  
林亭之上尊有醴盤有蔬肴載雜陳勸酬交錯  
飲且半命能琴者作古操一闋禽鳥翔舞雲風  
低徊先生於是歌木蘭之引以寓斯文之至樂  
而詠聖澤之無窮也明日僚友酌酒而賡之又  
明日諸生之長酌酒而賡之氣和詞暢洋洋乎

盛哉虞集起言曰古之教者必以樂故感其心也深而成其德也易命大夫者猶與之登高賦詩而觀其能否茲事不聞久矣今吾師友僚佐乃得以講誦之暇從容詠歌庶幾乎樂而不淫者亦成均之義也令弟子輯錄為卷以貽諸好事者可覽觀焉

道園學古錄

國子監營繕官舍記

陳旅

至順三年春南陽富珠哩先生以集賢直學士兼國子祭酒時監有隙地在居賢坊大德中有

司議以建學餘力築屋以舍師儒不采也既而  
司業東平岳公監丞汾陽張公典簿郭君彥文  
博士潘君履道助教張君常道鄔君缺華祁君  
伯溫屬掌儀王儀孫師魯約所入贄貲方規度  
而未就明年五月以中統楮泉二萬餘緡筮吉  
日籌工度費除地坊北畫為四區區各立屋五  
間中三間為居室旁兩間為肅官具饗之所宅  
之門以東西門之街以南北街北距通衢立大  
門街南羨壤可藝蔬東浚井西置屋以居隸者

使掌大門之管以羸貲治舊宅二區之在坊中者其西圯甚易敗桷腐莢補以新瓦而墜塗之旁起屋如北坊之制東宅西偏作室象舟可居琴書東南作見賓之室曰賓庵七月經始九月

成

安雅堂集

明

石鼓文後

楊士奇

右石鼓文十元國子監司業潘迪考訂音訓刊附於後在今北京國子監士大夫北京來者多



得之以見贈此本得於胡學士光大紙墨獨佳  
此刻鄭夾漈定為秦篆歐陽公集古錄疑此文  
自宣王共和至宋嘉祐千九百年且文細刻淺  
理不應得存又疑其自漢以來博古好奇之士  
皆略而不道予謂石鼓文決非秦漢以下之人  
所能所謂文細刻淺者安知當時不深刻歷世  
久遠則磨滅如此而今文字之存者計裁三之  
一耳其中不可辨識者又三之一則亦久遠之  
驗也荒郊野草之中古物委棄何限如其金玉

之類雖殘毀不完苟遇之即庸人小子皆知而取之矣為石雖有文字苟不遇好古博雅之士則不為世所知而不見稱道固其理也且三代鐘鼎自彝之屬前未嘗見稱於世而後來田夫牧子往往出之荒野埋沒之中者代有之矣何獨致疑於石鼓哉

書國學羣書殘編後

何喬新

元有天下垂百年頗崇儒雅經籍之版藏於國子監者甚富天兵入燕百司安堵經籍皮置如

故無毀棄者宣德以來典守者不以為意蟲鼠  
蛀齧之餘膳奴監隸或竊以宿火殘脫磨滅百  
僅一二者存焉然其存者字畫既妙刻手亦精  
非今書坊鹵莽之比雖殘章斷簡使人把玩不  
忍釋手今大司成京口費公惜其可寶而不完  
也乃模印裝褙共為一帙間以遺予予閱之如  
夏小正考儀禮逸經江文通文集皆今世所不  
傳者又其字偏旁多用古法精緻可愛因題其  
目曰國學羣書殘編時出而覽之亦足以佐嗜

古之癖。古人有得古漆簡者。寶而藏之。此編豈徒漆簡之比哉。迺書以示後之人。

何喬新文集

新立祭酒公館記

林瀚

自昔祭酒無公館。先後任是官者。皆僦屋以居。宏治三年冬。予以春坊諭德。拜命蒞任。亦就征南將軍黔國公第居焉。歲入白金八兩。以為常。越五載甲寅秋。乃以日膳之資。積於公帑者百三十五兩。購

文廟第三卷郎雄指揮舊宅一區。謀之司業安成劉

公震委監丞林大猷經營其事復專令掌饌王永董其役撤舊而新之增以第二重三間連落成計所費與所購之直等焉明年乙卯冬再建第五重三間又明年丙辰秋復建門樓二間所用視前購之直又等焉以間計二十有六深可二十丈許廣則前狹而後張東西界以垣前一槐則戊午春予手植東石橋亦是春給工五兩修焉予始遷而居公卿大夫多載酒落之曰盛哉此舉前所未有也已未秋予轉吏部侍郎庚

申夏進南京吏部尚書當辭

聖廟之任司業黃公珣方署太學印章命典簿徐英  
請紀其事遂撮是館之始末用壽諸石俾後賢  
踵居者或遇敝漏則出膳資修葺以待後賢則  
不必計所費而責償後賢又以此而待夫後賢  
斯館當與廟學同存矣庸記此以起後賢之思

林瀚  
文集

跋吏部舉薦謝祭酒咨文

吳寬

台南謝方石先生在宏治初以翰林侍講擢南

京國子祭酒一時以為得人未幾先生移疾去  
屏跡山中著書自樂絕意仕進而言者以先生  
學行純正宜表率當時薦章交上上深納之然  
不欲煩以吏事也前三年會祭酒缺吏部遂以  
先生擬上而先生具疏再辭不獲命始勉就道  
既至諸生皆以為得師而士大夫則賀朝廷之  
得賢也方先生起用時吏部有咨文三道其第  
業從之來取其詞剪帖成卷持以相示寬覽之  
非特見先生之賢又以見下之見賢能舉上之

得賢能用而式克欽承之意又於大臣見之嗚呼何其盛哉其謂之咨文者文移之體云爾初通有寬押字蓋寬時佐吏部也

重修祭酒公館記

張 袞

予自遷官太學舍傍有一宅蕪穢不治吏告予曰此祭酒公館也棟橈壁壞不可居矣予造觀焉壁間碑記前南京吏部尚書謚文安三山林公所撰公在宏治庚戌嘗為祭酒正己率物教行化浹太學至今諷誦之堂乃公所別建非所



居之舍也公記未嘗及此嘉靖甲午公子少司空廷樞嘗一葺之未幾而堂以不守易壞予因謀諸司業王公同祖曰文安故迹聲望累朝教化所從以出可使棄弗治已乎於是召匠計庸審材闢土請於司空以舉事飭修太學之餘錢若干緡佐之梵基累址撤故從新肇工壬寅夏五月己亥訖於秋七月乙卯凡三閱月有奇重軒宏宇堅甍良材黝堊煥若加於舊觀前為門三楹繚以周垣堂之後為亭一座雷四角中虛

而外敞賓客有位游息有所今所增飾也予嘗  
聞之高明燕憩之具君子資焉皆足以發聰明  
而助內省宋儒張伯玉亦曰先王之教化欲人  
易入也創物揆制郁乎聲明文采之盛先以聳  
觀其耳目然後清發其神明之府庶幾不勞而  
有功由是觀之堂構之葺與否若於教化宜不  
甚急而政體所關意向所指予猶不敢或後况  
其所當先勉者乎堂既成羣公來歌來遊舉酒  
落之予退而與諸生揖讓其中仰前人之遺矩

風範若存而考德辨業求不墜於聖人之道以思所謂高明者則斯堂也亦有警於予矣是役也大司空西蜀甘公為霖實興起之董其事以底於成者營繕郎中周君如砥也爰刻辭於石置諸右壁與林公碑記並傳云

明太學志

國子監奉旨刊十三經注疏先進孝經跋

陶望齡

維天子懋學晞聖垂意於經術詔臣等校繙十三經注疏重刻之辟雍孝經最先竣謹頓首進

御而蒙鄙謬為言附諸後曰昔

孔子贊易刪詩書定春秋禮樂其閎者網提政事考  
稽風謠釐舉名分極命於儀物等殺而精者苞  
陰陽之紀通神明之奧博大微渺至矣然其退  
而托諸述者而後世尊經者由

孔氏亦未嘗名之曰

孔氏之經也其係

孔子言斷然以經號者惟是書而已夫生而能之不  
詔而人喻焉此天下至通甚易者也其博大微

渺者

夫子既附之刪述而取夫邇且易者自名其書聖人  
之所謂道其可識也上下異操遠近不同等故  
或有韋素之懿行而帝王同之者其以天子撫  
有四海之隆貴而術不必有加於士庶人則天  
之明因地之利至德備焉又何其博大而微渺  
哉書言君陳惟孝友于兄弟克施於政而漢儒  
揚雄亦云孝莫大於寧親寧親莫大於寧神寧  
神莫大於得四海之歡心蓋施庭內而謂之政

浹四表而謂之孝。非二端也。天子既已敦崇色養。又身帥之。正令為父子兄弟。足垂萬世法。於以寧兩宮。歡四表。所稱一人有慶。兆民賴之者。何以加於茲。則今日刻經意也。

兩雍議

湯來賀

程子曰。治天下以得人才。正風俗為本。太學者人才之所由造。而風俗之所由成也。國朝舊制。舉人貢士。必入監肄業。大司成率其屬。月課而教導之。肄業十年。然後許其入官。猶慮其弗嫻。

吏治也於考職之先又撥各衙門歷事數月勤習政事然後咨送銓部量才定職較之臨軒策士其法更詳詎非制之盡善者乎乃世人視為故事苟且塞責舉人入北雍者以白鏹七金給與長班令之按期報名而肄業之規可以盡廢矣至謁選之時又用數金而撥歷俱免嗚呼司成各部其位與權不可謂不尊矣乃聽一長班之指使天下之可歎有甚於此者乎舊冬特奉有明綸舉人必入監肄業又許南北就近此大

釐積弊。眞為聖朝之舉。可以造士而維風矣。愚生即遵旨。造行。初見雍中禮貌嚴肅。躍然歡忭。以為可以進德也。乃與月課者三。所恃者文焉而已。司成接見諸士。所議者亦文焉而已。課文兼出小題。課後數日。列榜高下。若生童就郡縣試。嗚呼。何其小也。夫八股之業。童而習之。何益於蒼生。何裨於實用。而煩司成之講究乎。且舉人既以七藝獲售。豈不能八股而猶待雍課乎。大司成之造士如斯而已乎。蓋數百年來積習。



相沿一時難以遽變耳今皇上特隆曠典諸士  
不憚跋涉遠者數千里近者亦數百里赴茲盛  
舉以為必講理學必籌經濟以講他年實用乃  
徒督課於八股斯已過矣且甫踰一月輸銀數  
兩即告假而歸仍習為故事矣不亦大負朝廷  
而輕當世之士哉夫治道莫先於教化倘誠心  
力任未有不能行雖當積弛未有不可行者也  
昔程子為晉城令民有事至縣必告以孝弟忠  
信鄉必有校暇時親至召父老與之語兒童所

讀書親為之正句讀。張子為雲巖令。以敦本善俗為先。每月吉具酒食。召鄉人高年會縣庭。親勸酬之。使人知養老事長之義。朱子主同安簿。兼領學事。選邑秀民充弟子員。訪求名士以為表率。日與講說聖賢修己治人之道。及差發南昌軍事。數詣郡學。與諸生質疑問難。誨誘不倦。其留心教化何若是之亟也。他如陳襄之令仙居。蔡襄之守泉州。劉珙之知潭州。皆以勸學興善為急務。況司成之職。專在教人。而可以自怠。

乎哉誠能尊重德行講求義理委曲教導以化其氣質之偏而成其為有用之才則數十年後士風丕變而天下之賢才不可勝用矣然而未能者何哉悠忽不勤而委靡不振也記曰師嚴而後道尊又曰教人必盡其誠使司成勿顧情面非父母果病及身負篤疾者不容告假即假歸者勒令速至而又殫精立誠以勤厥職日坐公堂與諸生講學不因寒暑而間所講經書之外必深繹性理及綱目通鑑而歸本於躬行必

倣胡安定設經義治事二齋以勵實學間課以文亦必試論策試奏疏聽其盡力發揮而勿拘以成格則人才可得而知也又於雍中取其卓然實用者日加獎勵而特薦於朝廷以爲諸士勸既勤親講又令諸生各據所見以觀學術之淺深若能究心理學或具經濟異才者不拘資格必獎賞而薦拔之其有不在學宮而願來聽講者亦弗之禁如此則人材盛風俗美庶幾可不負皇上育才之盛心而天下之平可拱而俟

之矣

內省齋  
文集